

15 JUN 1999

EKSPLO CINTAI MALAYSIA '99 DIJANGKA CATAT REKOD

KUALA LUMPUR, 15 Jun (Bernama) -- Ekspo Cintai Malaysia '99, yang memberi tumpuan kepada barangan buatan tempatan termasuk sektor hartanah, dijangka disenaraikan di dalam "Malaysia Book of Records" sebagai ekspo terbesar yang pernah diadakan di negara ini.

Sebanyak 900 gerai disediakan bagi ekspo itu, yang akan berlangsung selama 10 hari mulai 13 Ogos ini di Malaysia International Exhibition & Showroom (MINES).

Perdana Menteri Datuk Seri Dr Mahathir Mohamad dijangka merasmikan ekspo itu, yang diadakan bersama oleh Dewan Perniagaan dan Perindustrian Cina Kuala Lumpur dan Selangor (KLSCCCI) serta MINES.

Pengerusi jawatankuasa penganjur, Kerk Loong Sing, berkata sehingga kini sebanyak 600 pengilang, pengeluar dan usahawan telah mengesahkan penyertaan mereka termasuk 10 pemaju hartanah, yang pertama kali ditawarkan menyertai ekspo itu.

"Satu daripada objektif Ekspo Cintai Malaysia '99 ialah membantu para pemaju perumahan mempromosikan unit hartanah mereka dan Kempen Pemilikan Rumah," katanya.

Ekspo tahun lepas, yang menyediakan 442 gerai, telah menjana perdagangan berjumlah lebih RM20 juta setelah berjaya menarik 566,000 pengunjung.

"Kami menjangkakan jumlah pengunjung ekspo tahun ini berganda," kata Kerk pada majlis pelancaran promosi ekspo itu bagi pemaju-pemaju perumahan di sini.

Pelancaran dilakukan oleh Menteri Perumahan dan Kerajaan Tempatan Datuk Dr Ting Chew Peh.

-- BERNAMA

NHD NAK